

Lukas Moorhead, otro hoben cu a caba trayecto Formacion Social cu exito

ORANJESTAD- E di dos grupo di hoben di Formacion Social a caba cu e trayecto cu a dura un aña. E echo festivo aki a wordo celebra den Fort Zoutman. Presente tabata, e motor tras di e proyecto aki, Prome Minister Eman, miembronan di Parlamento, lider di e proyecto Sra. Jessy Ras, representantenan di VNO, miembronan di Marina Real, docente, mayor, amistad y demas invitadonan. E 12 hobennan a surpasa e retonan cu exito. Durante un aña largo nan a sa di traha duro pa yega e punto final cu un certificado den nan man y un trabou na

bista. Lukas Moorhead ta un di e 12 hobennan cu a haya su certificado di man di Prome Minister Eman y lider di e proyecto Sra. Jessy Ras. Para meymey di su mayornan, Lukas a bisa di ta contento con cos a bay. Su tata cu ta biba na Florida a bin Aruba pa ta para banda di su yiu na e bunita ocasion aki. Lukas mes ta haya cu e aña a pasa lihe. "E parti cu mas mi a gusta ta esun na kazerne, aunke cu scol ta importante tambe". Lukas a gusta e bida militar asina tanto cu e lo kier drenta Arumil. E posibilidad ey t'ey ya cu na luna di augustus ta

recluta hobennan pa drenta servicio militar boluntario. Pa Lukas e prome luna di training tabata e periodo mas dificil, pero el a custumbra lihe. "Mi a tende di e programa aki via un amigo di mi. Mi a bay inscribi, mi a 'hou vol' y awe mi ta cla pa sigui cu e siguiente paso den mi bida". Sr. Moorhead, para banda di su yiu a bisa di ta 'a very proud father'. "Mi ta masha agradecido na tur cu a yuda organisa e programa aki. Ta bon pa duna hobennan un oportunidad asina y mira nan ta exitoso despues". Lukas tin un conseho pa e hobennan cu



Riba e foto por mira Lukas Moorhead hunto cu Jessy Ras, lider di e proyecto Formacion Social y Prome Minister Mike Eman.

ta den e mesun situacion cu e tabata un poco mas di un aña pasa. "Boso bin join e programa. E ta bon". □